

四明叢書

張宗祥



朱先生有聞

朱有聞字子益浦江人幼孤長能刻苦爲學夏不避蚊
冬不擁爐久之悉通諸家書作文尙質實有理致視富
貴無所屈縣令丞而下欲見之不能得東萊知其有守
而多聞訪之逆旅中再以書速竟不行東萊愈重焉淳
熙十六年卒

金華府志

郭氏學侶

湯先生致

湯致麗水人淳熙五年進士遊學西園最久後請爲西

國師其別郭伯清序云乾道元年予寓東陽郭氏之塾與伯清周旋書冊閒終歲而歸三歲伯清至括蒼見予于家數日卽去又自東陽東又復過辭去 石洞遺芳

東萊家學

補忠公呂大愚先生祖儉

梓材謹案王忠文跋先生帖云忠公受學于成公而用其父倉部澤補官中銓試授修職郎又云安置韶州改遷吉州明年移筠州越四年卒于筠之大愚僧舍金華府志云量移筠州寓居大愚寺自號大愚叟

呂子約說

時習之義程子云習重習時復思繹浹洽于中則說此恐是學原于思之意凡所當事者皆學也不致其思繹以通之則無自而進苟苦思力索則淺迫無味亦失所謂說矣惟學焉而時復思繹勿忘勿助積累停蓄浹洽涵養杜元凱所謂如江海之浸如膏澤之潤渙然冰釋怡然理順然後爲得此卽時習而說之注釋也

朱子答曰此說甚佳

巧言令色鮮矣仁論章旨則尹氏之說爲完若旁通其義如辭欲巧之類是迺修省細密功夫其發原自別然

修辭之功亦易得入于安排計較而不自知其所發之偏者亦爲鮮矣之仁也

朱子答曰發原自別之說甚好修辭之功固易入于安排計較然亦只得就發原處謹之耳若捨此而別生疑慮則又轉見繳繞不得剖決也

近看得忠恕只是體用其體則純亦不已其用則塞乎天地其體則實然不易其用則擴然大通然體用一源而不可析也故程子謂看忠恕自見相爲用處而夫子曰吾道一以貫之

朱子曰此說甚善

惻隱羞惡辭讓是非四端之著也操存久則發見多
懣憂患好樂恐懼不得其正也放舍甚則日滋長

附錄

在謫所讀書窮理賣藥以自給每出必草屨徒步爲踰
嶺之備嘗言因世變有所摧折失其素履者固不足言
矣因世變而意氣有所加者亦私心也

朱子答子約書曰目下放過了合做底親切工夫虛度
了難得少壯底日子

又答書曰大抵學問只有兩途致知力行而已在人須是先依次第十分著力節次見效了而後又看甚處欠缺即便于此更加工夫乃是正理今却不肯如此見人說著自家見處未是却不肯服便云且待我涵養本原勉強實履此如小兒迷藏之戲你東邊來我卽西邊去閃你西邊來我又東邊去避如此出次何時是了耶又答輩仲至書曰子約子弟近得書云歲前明招大火其柩幾不免幸而獲全却不知其厚葬之說但得汪時發書似頗有所不快意不知曲折如何也

又答儲行之曰張鄭黃鄧相繼物故呂子約前月亦不起疾殊可傷悼是亦氣運使然豈可辜咎章子厚耶

袁絜齋題先生帖曰禮部既卒子約獨當門戶之責益自奮勵卒以觸權要獲罪謫死彭忠肅之攻韓也子約以爲已甚旣而自攻之友人石應之問其故子約曰彼從臣可以從容獻納我小官幸而獲對敢不急盡忠乎樓攻媿題先生書曰嘗評其人楊秉三不惑之外視軒冕又如浮雲非勉強然也見其進未見其止觀人多矣未有表裏如一如子約者所謂蓋有之矣我未之見也

眞西山跋呂子約帖曰大愚呂公清風直節爲一世偉人某不及見之矣而獲見所與彭君仲誠講學數帖其論讀明道行狀可以觀聖賢氣象讀書以論語爲主履踐以毋自欺爲本富哉言乎豈惟仲誠父當終身服膺善學者皆當寫一通寘諸座側

又東萊大愚二先生祠記曰成公所傳中原之文獻也其所闡釋河洛之微言也扶持絕學有千載之功教育英才有數世之澤及慶元初孽臣始竊大柄大愚以一太府丞抗疏顯斥其奸孤忠凜然之死不悔迨其晚年

義精仁熟有成公之風焉

王忠文跋先生帖曰公此帖遺其友汪時法乃在台時所遺其在台州通歲大祲用常平使者委廣行勸分躬履郡境靡所不歷民受惠全活者甚眾使者言于朝因命徧行浙東視諸郡賑事其盡心一如在台時帖中所謂既食其食則思任其責一任其責則民命在我慄慄乎可畏者諒哉仁義之言矣

大愚講友

王先生鉛

梓材謹案先生字季和爲大愚之友嘗爲四明船場朱子文集答先生書二第二書謂孔門之教不過孝弟忠信持守誦習之閒云

石先生宗昭

詳見槐堂諸儒學案

汪先生大度

詳見麗澤諸儒學案

姜先生柄

缺

東萊門人

文定葉水心先生適

詳水心學案

文肅黃勉齋先生幹

詳勉齋學案

直閣詹先生體仁

萬先生人傑 並詳滄洲諸儒學案

方先生璟

方先生琚

方先生璘

縣令郭先生浩 並見滄洲諸儒學案補遺

林先生居實 別見止齋學案補遺

孫先生應時 詳見槐堂諸儒學案

承奉李先生充庭 別見槐堂諸儒學案補遺

張先生垓 詳見水心學案

東萊私淑

補
常博李先生大有

附錄

主太常簿謙仲習于禮顧籩豆簠簋登俎尊罍位置失
次脊脅臂臑肫肩亦多闕體黷白黑禮以熬薦時用生
形鹽傳謂象虎時散鹽黍稷稻粱而概用秬五齊三酒
而概清醕瘞療徒具文樂歌不卒章乃按三禮條具其
儀法請釐正之遷太常博士

在平江正歲鄉之大夫士屬于序謙仲爲正齒位放古

飲酒禮且取前賢鄉約鄉儀鉅梓以風示之士習用勸
謙仲頌觀嚴重廉直不受請寄昧旦衣冠率諸子誦語
孟若詩參以先儒傳釋精誦熟講日有常則
爲鄉邑營社倉用朱文公及建安吳氏舊法
幼與弟大同親師力學早孤遣大同受學于朱文公而
躬任家事不以遺母勞

戴岷隱先生溪

詳見止齋學案

監承孫東白先生德之

別見說齋學案補遺

樓先生鑰

詳見邱劉諸儒學案

侍郎黃先生師雍

詳見勉齋學案

大愚門人

朱先生在

詳見晦翁學案

阮先生泰發

父元白缺

袁先生樵

缺

東萊續傳

知州呂先生中

呂中字時可晉江人淳祐中登進士遷國子監丞兼崇政殿說書奏乞晚輪二員說書夜輪講官直宿以備顧

問又言進講經史乞依正文進讀不宜節貼避忌不惟
可察古今治亂亦以革臣下諂諛之習當路忌其直徙
汀州在汀朞年演易爲十圖

姓譜

梓材謹案先生所著又有論語
講義皇朝大事記治迹要略

附錄

除國史實錄院檢閱上疏言當去小人之根革臧吏之
弊

兼崇政殿說書言人能正心則事不足爲人君能正心
則事不足治

嚴先生粲

嚴粲字明卿一字坦叔邵武人精于詩著有詩緝林希逸謂其鉤貫根葉疏析條緒或會其旨于數章或發其微于一字辭錯而理意曲而通逆求情性于數千載之上若見其人而得之以發溫柔敦厚之意詩于是盡之矣

經義考

梓材謹案袁蒙齋集有贈嚴坦叔序稱其抱負才業有志當世

嚴氏詩說

麟之趾指麟言也于嗟麟兮指公子言也猶楚狂接輿